

Pesta Krismas UMS kali ke-7 berlangsung dengan tema suka cita

NSR 17.12.2018

KOTA KINABALU: Pesta Krismas Universiti Malaysia Sabah kali ke-7 berlangsung dengan tema suka cita yang mana acara tahunan tersebut adalah antara acara yang menjadi 'highlight' utama dalam takwim kalendar UMS.

Acara tersebut telah disertai oleh orang awam, kakitangan dan pelajar dengan catatan kehadiran melebihi 2500 orang pengunjung.

Pengarah program Yuselley Yuyut berkata tema suka cita dipilih sebagai lanjutan kepada tema penyatuan bagi acara serupa edisi tahun lalu.

"Tema suka cita 'joy' yang dipilih tahun ini adalah lanjutan kepada tema kesatuan 'unity' yang kita bawa pada tahun lalu yang mana tema suka cita ini adalah simbolik kepada perasaan suka cita semua yang hadir dalam acara malam ini, untuk sama merayakan dan meraikan perpaduan kita.

"Saya amat berbesar hati diberi peluang memikul tanggungjawab untuk mengetuai program ini dan dengan dibantu oleh lebih 300 ahli jawatankuasa untuk acara ini, kita telah merealisasikan Pesta Krismas kali ini dengan jayanya," katanya.

Dalam pada itu, Naib Canselor UMS Prof Datuk Dr D Kamarudin D Mudin berkata acara tersebut turut menjadi platform utama yang membentuk perasan muhibah dan harmoni khususnya dalam kepelbagaian masyarakat dalam kampus tersebut.

"Platform muhibah ini turut menjadi pem-



POTONG KEK...Madius (tengah) bersama tetamu kehormat lain memotong kek dalam acara perasmian Pesta Krismas kali ke-7 UMS.

bentuk perasaan toleransi antara semua kaum di Malaysia dan khususnya di dalam kampus ini, semua pelajar mampu bersatu bersama merayakan kepelbagaian.

"Hal ini selaras dengan hasrat murni UMS untuk mengeratkan hubungan majmuk dalam kalangan mahasiswa UMS dan syabas saya ucapkan kepada semua yang terlibat dalam usaha menjayakan acara ini," katanya.

Beliau berkata demikian ketika hadir berucap semasa Pesta Krismas UMS kali ke-7 di sini Sabtu lalu.

Pesta Krismas adalah sebuah acara yang dirancang oleh Exco Sukan, Seni dan Budaya, Majlis Perwakilan Pelajar, UMS dengan kerjasama Bahagian Kesenian dan Kebudayaan, Hal Ehwal Pelajar (HEPA).

Pelbagai acara menarik berlangsung terutama

persembahan kebudayaan yang melibatkan para pelajar dan artis tempatan.

Antaranya adalah persembahan tarian, koir karoling, lakonan dan persembahan muzikal.

Turut hadir menyerikan acara tersebut sekaligus merasmikan ialah Timbalan Ketua Menteri merangkap Menteri Perdagangan dan Perindustrian Sabah, Datuk Seri Wilfred Madius Tangau.

OLEH NOOR ZAFIRA SHAFIE